

Retiro di Ricardo Croes y Rudy Lampe ta realistico

E decision di lider di partido RED, esta Ricardo Croes for di su partido y for di politica den su totalidad, tabata un decision realistico y logico y esaki ta conta tambe pa Rudy Lampe kende tambe a dicidi di bandona politica.

Ora cu analisa e trayectoria politico di Rudy Lampe, tin cu muestra cu su exito mas grandi tabata na 2009 ora cu den e proceso electoral como lider di RED, el a logra un total di 1360 voto individual pero su partido no a logra representacion den Parlamento. Pa eleccion di 2013 Lampe un biaha mas a bay eleccion como lider di RED pero ta sufri un caida den voto personal di 747 voto y a caida aki a continua den e proceso electoral di 2017 ora cu Lampe a logra solamente 466 voto.

Durante di e proceso electoral aki di 2017, Lampe a dicidi di pone Ricardo Croes como lider pa eleccion di 2017 caminda RED por fin a bin logra saca un asiento pero Lampe su aporte a stanca un biaha mas na be cifra menciona di 466 voto pero na momento cu su partido a dicidi di forma parti di Gabinete Wever Croes I, Lampe a retira for di RED y a bira Minister di Enseñansa. Despues cu lider di MEP a dicidi di manda su gabinete cas, RED a bira e gran perdedo hunto cu partido POR caminda Rudy Lampe a sigui cay den su popularidad logrando unicamente 170 voto personal.

Siman pasa e carera politico di Lampe a sufri otro sla mortal ora cu a bin resulta cu su presencia riba lista di RED a confirma cu ya votadonan no

ta mira un vision politico concreto y el a bira cay na e pio resultado den su carera politico, logrando solamente 89 voto. Ricardo Croes a drenta politica na 2013 ora cu el a aparece na number 2 riba lista di RED net tras di Rudy Lampe caminda el a logra sorprende cu 420 voto personal pero e partido no a logra representacion den Parlamento. P'e proceso electoral di 2017 sinembargo, Ricardo Croes a keda nombra como lider di RED y a presenta e vision di converti marihuana medicinal, den un di dos pilar economico pa pais Aruba y el a logra na ricibi 3369 voto personal pa asina guia su partido RED pa haya representacion den Parlamento pero na mes momento, pasa pa forma parti di un coalicion hunto cu MEP y partido POR.

Un coalicion cu no a cumpli cu periodo di gobernacion ya cu na 2021, Evelyn Wever Croes a dicidi di manda su gobierno cas despues di un conflicto cu POR pero tambe pa diferencianan serio cu RED. Den mesun siman cu RED kier a bay Gobernador pa retira su sosten di Gabinete Wever Croes I, e lider di MEP no a laga esaki pasa y a entrega retiro di su gobierno pa motibo di un investigacion contr'e lider di POR pa malversacion di fondonan di e fundacion di 'frak-tiemedewerker.' Den mesun eleccion di 2021, e situacion a cambia formalmente pa lidernan di RED caminda Ricardo Croes a mira su total di 3369 voto na 2017 keda reduci te na 1184 cual tabata un perdida di 2185 voto.

Sperando pa recupera e tereno perdi den eleccion di siman pasa, lamentablemente votadonan a perde e confiansa total den e lider di RED y Ricardo Croes a mira su total di voto wordo limita te na 635, loke ta nifica cu for di su triunfo grandi na 2017, Ricardo a perde 2734 voto personal loke ta haci e decision cu el a tuma di retira for di politica, algo realistico y logico!

